

B. N. C)

FIRENZE

1086

13



1086.13







1986.13

~~1503~~



XV MALP.

61

24471

---

4. Dec. 1688.

**E** Pistola hæc accuratissimi Naturæ Investigatoris  
Inventis Anatomicis felicissimi, Marcelli Mal-  
pighii, Philosophi & Medici Bononiensis, REGIÆ  
SOCIETATIS ANG. Symmystæ dignissimi, de  
Structura Glandularum Conglobatarum Consimili-  
umque Partium, Typis mandetur.

Carbery Præf. Reg. Soc.

---

7

MARCELLI MALPIGHII  
PHILOSOPHI & MEDICI  
BONONIENSIS,

*E Regia Societate Anglicanâ,*

DE

Structurâ Glandularum Conglobatarum  
Consimiliûmque Partium

EPISTOLA,

REGIÆ SOCIETATI

Londini ad Scientiam Naturalem promovendam,  
*instituta, Dicata.*



LONDINI,

Apud Richardum Chiswell Regiæ Societatis Typo-  
graphum. MDCLXXXIX.



---



---

MAGNÆ  
SOCIETATI REGIÆ  
ANGLICANÆ.

*Marcellus Malpighius S.P.*

**V**ESTRA iterum studia, Sodales:  
Doctissimi, post multorum annorum  
silentium interpello. Hactenus enim  
enervatus animus, & familiares curæ:  
à Naturæ meditatione feriari coëgerunt. Anxius,  
fareor, quorundam semper dilucidationem phæ-  
nomenorum, & præcipuè circa *Glandularum con-*  
*globatarum* structuram exoptavi; quod quidem  
unum post evulgas de *Viscerum structura* exerci-  
tationes, interpolatis vicibus & remisso studio  
indagabam; sed præter implicitam in glandulis  
structuræ machinam, me plurimum morabatur  
sagacissimorum Virorum firmum illud assertum,  
*Conglobatas* scilicet *glandulas* non aliud esse, quàm  
valorum implicatum nexum; unde, licèt subob-  
scurè peculiaris mihi appareret compages, hanc  
tamen velut illudens phantasma neglexi, donec

revocatis severiori curâ studiis, improbo tandem labore Glandularum conglobatarum structuram, aliarumque consimilium partium analogam compagem dilucidè, ni fallor, mihi visum est detexisse. Quæ igitur observata longo temporis tractu collegi, brevibus Vobis famigeratissimis Viris aperiam, ut institutâ de more accuratissimâ indagine, tam obscura, & necessaria machina erudito Orbi innotescat.

*Glandularum*, quæ *conglobatæ* vulgariter appellantur, multiplices sunt species, si spectemus exteriorem configurationem, internam compagem, & diversos succos per propria excretoria, vascula eructatos. Harum nonnullas, & præcipuè simpliciores, aliàs indicavi, & circa ipsas parum immorari nunc liceat.

Naturæ itaque ordo, attentâ majori vel minori simplicitate, organorumque multiplicitate, talis videtur esse, ut aliàs etiam in Epistola ad eruditiss. *Sponium* indicavi. *Glandula*, quâ palatum, œsophagus, intestina, & consimiles partes copiosè ditantur, est omnium *simplicissima*, & ideâ reliquarum glandularum: Hæc itaque folliculo membranoso, seu loculo constat, qui ovali, interdum rotundâ, quandoque lenticulari, vel oblongâ constat formâ; concavitate pollet, quæ ut plurimum in vasculum excretorium aperitur, quo separatus humor in peculiarem capacitatem, vel foràs extrâ pellitur. Circa loculum, seu folliculum

liculum vasa sanguinea, & nervi diramantur, & ut conjecturâ assequi licet, carneæ fibræ circumducuntur, vel saltem sub plano extensi musculi locantur, ut in ventriculo, & œsophago patet. Huic proximæ succedunt Glandulæ majori loculorum numero ditatæ, quales sunt in facie, in labiis, in quibusdam cutis partibus, circa pudendum, & palatum; excretorio namque vasculo, interdum oblongo multiplices appenduntur loculi membranosi in ipsum hiantes, circa quos sanguinea vasa, & nervi ramificantur. Exaratam glandularum structuram in conglobatis glandulis Natura obnubilar, nec oblita simplicitatis suæ, expositâ methodo in his compangendis procedit. Conglobatæ omnium consensu dicuntur glandulosa corpora solida, interdum dura, quandoque flexibilia, & tenera, ut plurimum depressæ figuræ, à quibus vasa succum à sanguine diversum promentia emanant. Locantur ad alas, ad inguina, in pinguedine, in mesenterio, & in tota ferè corporis regione. Hæ igitur glandulæ exteriùs membranâ valde densâ investiantur, quæ sanguineorum vasorum lateralibus ramis irrigatur. Sub hac carneæ fibræ circulariter ductæ locantur, quæ horizontaliter glandulæ corpus penetrant. Membrana hæc ulteriùs quamplurimis frequenter protuberat minimis tuberculis, rotundis, ex contentis intra glandulam turgentibus corporibus. Diductis membranis, vel satiùs factâ per longum cultro

cultro glandulæ sectione, diuturnâ ejusdem maceratione aquâ communi, diligenti indagine hæc occurrunt.

Primò ab ambiente membranâ *carnea fibra* per transversum ductæ emergunt; Hæ autem non parallelæ ducuntur, sed obliquatæ sibi occurrunt, & lacertorum inosculatone, vel saltem implicatone, multiplices, & penè innumeras retis areæ efformant, quæ subrotundæ sunt, quandoque angulares, & magnitudine dispares. In medio cujuscunque areæ locatur locus, seu folliculus glandulosus, qui rotundâ, vel ovali constat formâ, & ex majori, minorive contenti corporis copia amplior, vel contractior redditur. Membranâ candidâ integratur molli, quæ evacuato humore in seipsam collabitur, & si secetur, concavitas obvia fit, & persimilis est glandulis *Lienis*. Interdum gemini loculi, vel tres in eadem area continentur. Quoniam tamen contrectatis glandulis hujusmodi loculi exinaniti contrahuntur, & obscurantur, ideo non perpetuò facillè patent, & per plura lustra meam mentem, & oculos dubios reddidèrunt; tandem in glandulis ægrotantium bouum, & similium effulsit lux; interdum enim adauctas glandulas ad latitudinem manûs deprehendi, in quibus loculi tartarcâ materiâ referti ita turgebant, ut exiguâ indagine paterent. Deductâ igitur observatione in minùs morbosas, & postremò in integrè sanas, vera patuit



tuit compages. In exaratis itaque glandulis, quæ obstructæ dicuntur, folliculorum membrana solidior, & crassior existit, factâ comparatione cum sanis, & circa ipsas occurrunt manifestiores propagines vasorum sanguineorum varicosæ, & reticulares, quas interdum in loculis grandioribus, & quasi rubicundis admiratus sum. Ut autem in singulis glandulis emergant loculi, exterior glandulæ portio lustretur; nam singuli tumores ex turgentibus intus loculis patent, & sectâ glandulâ, sub ipsâ membrana loculorum ordines, fibrarum areis circumsepti, occurrunt. Glandularum expositi folliculi replentur humore quodam cinereo, & parum diaphano, si in Naturæ statu spectentur; cæterum ægrotante animali diversa corpora continentur, ut plurimum tartarej, mucosique humores, vel concreti succi, ut in reliquis tumoribus passim observamus.

Appenduntur loculi *vasis sanguineis* supra fibrarum carnearum fasciculos excurrentibus, & areas efformantibus; quare varia strata hujusmodi arearum, & spatiorum superpositorum, glandulæ corpus integrant. Sanguinea vasa, arteriæ scilicet, & venæ descriptas glandulas intrant multipli frequenter ramo, ipsarum latus subeunte, & in quibusdam grandioribus glandulis, trachæ hærentibus, vasa ingrediuntur ventrem, ubi glandularum oppositæ extremitates reflexæ, &

B

invicem

invicem approximatae sinum efformant. Vasa hæc subingressa rete efficiunt insignioribus ramis, & extremis propaginibus in loculos, & parietes arearum desinere videntur. Nervi quoque multiplices, & interdum unus subintrat glandulae corpus. Et licet in quibusdam glandulis interioris reticularis textura ad modum raræ membranæ appareat; filamenta tamen illa non omnia sunt nervosa, sed frequenter sunt portiones carnearum fibrarum gracilium, & laciniatae membranæ, quæ exterioris universam ambit glandulam. Exarata hucusque Conglobatarum structura in Bruti observata, & præcipuè in Bove, in Homine etiam manifestatur, si tamen longâ maceratione glandulae præparentur.

An præter exposita sanguinea vasa, & nervos, aliud vasorum genus à glandulis promatur, quod vicem *excretorii vasis* habeat, indagandum venit. Ut autem in re tam difficili, in qua nec cultri opus, nec separatio haberi potest ob substantiæ friabilitatem, & partium exiguitatem, facilius incedamus, datis quibusdam sensatis observationibus conjecturando procedemus. Certum est igitur, conglobatis glandulis *lymphatica vasa* appendi, quæ cum ipsarum substantia intimum commercium habent, unde unicum lymphaticum minimas penetrat glandulas, & frequentissime multiplicia subintrant grandiores glandulas, ita ut ex his, quæ hucusque observare potui, asserere

ferere liceat, quamlibet conglobatam glandulam lymphaticis ditari. Horum progressus, & insinuatio ob membranarum molliem, glandularum resistantiam ex reticulari opere, dissolutione attingi non potest. Quapropter quædam tantum enuntiabo tentamina, à quibus lucem mutuari licebit. In Asino, ut sæpius observavi, conspicuum, oblongumque excurrit lymphaticum vas insigne per mesocolum, à quo lateraliter rami promuntur, qui evidenter glandulas intra tunicas mesenterii locatas non longè ab intestino subintrant. Immissum igitur atramentum, exaratum lymphaticum celeriter & foeliciter excurrit, & manifestat expositum ductum usque ad glandulas conglobatas in mesenterii centro situatas, & delineatâ anaglypticè ramificatione, qualis in arborum foliis occurrit, totam glandulæ substantiam altè inficit, quin & laterales etiam glandulas per peculiare ramos transductum subintrat, manifestatâ eadem surculorum propagine; nec sistit hic atramentum, sed ulterius ab expositis glandulis per subortos lymphaticos ductus versus receptaculum productos erumpens, in chyli cisternam postremò sese insinuat. Aliud quoque addam, quod casu mihi observandum in bove contigit, in quo tres glandulæ cavæ hepatis parti monstruosè adhaerent hærebant, ita ut quælibet magnitudinem ovi anserini æquaret; & cum lymphaticum vas

insigne pluribus furculis in unam ex expositis glandulis productum apparet, immisso atramento syringâ intra exaratum lymphaticum versus glandulam, illico exterius emergere loculi glandulam conglobatam compaginantes atramento turgidi, & ingens portio ejusdem glandulæ denigrata est, turgentibus reliquis lymphaticis furculis ultrâ producti; factâ deinde loculorum apertione, atramentum in singulis stagnabat.

Ex his igitur conjectari licet, lymphatica vasa è glandulis, postremo saltem, derivare *Lympham*. Et licet in aliquibus glandulis eandem inferant; quoniam tamen ibidem subsistere non potest appulsa lymphæ, & alium exigit terminum, ideo inferentium, & efferentium vasorum communio necessaria extat, & loculi etiam in intermediis hujusmodi glandulis commercium cum exaratis ambobus lymphaticis habent. Quapropter dubitare possumus, an Natura in determinatis, & frequentibus locis appendat lymphaticis vasculis intermedias has glandulas, ut novâ additâ materiâ, & impulsu, scilicet succe-dat motus lymphæ usque ad receptaculum chyli; ex carneis enim fibris glandulas ambientibus, & loculos colligantibus, compulsivus addi potest motus pertranseunti, & separatæ lymphæ. Hinc in lymphaticorum tubulis frequentissimæ observantur valvulæ, quæ primi impellentis languidum motum demonstrant.

An

An verò primus exortus, & origo lymphaticorum vasorum sit a glandulis minoribus, tanquam à fontibus, dubium est, quod meam adhuc torquet mentem, cujus gratiâ hæc mihi conjectari ex diversis observationibus placuit. Primò certum est, in exarato mesocolo asinino, & reliquâ mesenterii portione, quâ crassa colligantur intestina, non longè ab his locari glandulas copiosas, quæ in tabescentibus animalibus ob diaphaneitatem, & laxitatem membranarum evidenter patent, à quibus lymphatica pluribus surculis per easdem glandulas dispersis emergunt, & sursum elongata in truncum hiant, qui ad centrum, ut mox indicavi, deducitur; ultra verò glandulas ea in parte mesenterii, quæ nectitur intestinis, ut plurimum nullum observatur. ulterius productum lymphaticum. Aliquando unum, vel alterum deprehendi minimum, cujus terminationem mihi non licuit attingere, cum interdum obliquetur sub sanguineis vasculis, & quandoque intestinorum membranis obscuretur. Nec juvat injectio; etenim obstantibus valvulis infusum atramentum versùs glandulas minores, & miliares non superat resistantiam valvularum, sed potiùs inverso motu sursum excurrit versùs mesenterii centrum. Ad inguina ejusdem animalis à conglobata mollisque glandula, copiosa, & varicosa erumpunt lymphatica, quæ non  
longè

longè consimilem glandulam subingressa in unum canalem anserinæ pennæ similem hiant, ita ut admissum atramentum in proximum, & continuatum receptaculum chyli deducatur. Ab ultima itaque glandula posteriores productiones attingere non potui, quæ si fortè aderant, vel exinanita obscurabantur, aut præparatione lacerabantur: ex his itaque patet, lymphatica vasa emanantia surculis à glandulis minoribus medio trunco, vel iisdem ramis glandulæ ampliori inferi, à qua emergentia tandem in cisternam chyli exonerari, & terminari, & exinde non improbabilius primum exortum à minima glandula haberi, cum lymphæ materia intermediis glandulis augeatur, & in minimis frequentissimè ulterior vasorum progressus non habeatur.

Non minor difficultas est circa exortum vasorum lymphaticorum, quæ copiosa occurrunt in visceribus, & præcipuè in hepate, & liene. Et licet plura molitus fuerim tentamina pro horum exploratione, non tamen adhuc mihi evidentem licuit attingere primam eorundem originem. Ut autem distinctiùs pateant lymphatica in hepate & liene, diuturna immersio in aqua fiat; ex subingredienti namque sensim humore tument, & manifestantur, ita ut nil pulchrius conspici possit, si præcipuè observatio tentetur in vitulino, & ovino liene, cujus exterior

exterior membrana avulsa, & supra vitrum extensa, patula reddit vasa. Tanta est in liene exaratorum lymphaticorum copia, & diramatio, ut nec calamo, nec typis exprimi possit. Horum trunci circa crassio rem lienis partem ex eunt, ubi sanguinea vasa ingrediuntur, & egrediuntur. Producentur autem per totam lienis extimam superficiem per longum obliquè ex porrecti, & inter utramque membranam, carneam scilicet, & extimam, ramificantur. Multiplices sunt trunci, & mutuis anastomosi- bus inosculantur, ita ut quamplurimæ fiant areæ minoribus furculis occupatæ. Copiosissimæ sunt valvulæ, unde inæqualis consurgit trunci, & ramorum latitudo. Quandoque trunci extenduntur in latum quendam tubum, & quasi corculum, in quod multiplices desinunt rami, qui contiguè inosculantur, ita ut tota visceris utraque facies cooperiatur. Horum vasorum extremos fines assequi non potui; major namque ipsorum portio versùs limbum obliquè ex porrecta, ubi gracilescens extremitatem at- tingit, flectitur, & lymphatico vasculo per lon- gum crassitudinis excurrenti anastomizatur, ita ut oblongis areis rete consurgat.

Diu sollicitè quæsi, an corpus aliquod extre- mis lymphaticorum furculis appendatur, quo me- diante lymphæ separaretur, & expositis vasculis communicetur; nec adhuc quid certi enunciare mihi



mihi licet : infusus enim aer, vel coloratum liquidum versùs extremos fines, viam non invenit, obstantibus valvulis frequentissimis, solumque excurrit versùs truncum eleganti spectaculo. Sinite tamen, ut quæ in nonnullorum brutorum liene sæpiùs deprehendi, Vobis aperiam. In Liene itaque ovis diu aquâ macerato, non solum lymphatica turgida, & patentia redduntur, verum etiam in extima superficie circa limbum vesiculæ, seu membranosi loculi miliares copiosi emergunt, diaphano referti succo, qui manifestè appenduntur extremis surculis sanguineis à profundo lienis erumpentibus, & inter membranas, exteriorem scilicet, & interiorē reflexis, & propagatis. In his igitur frequenter stagnat diaphanus humor ; & licet continuationem cum expositis lymphaticis vasculis attingere nequiverim, conjectatus tamen sum, cum nullum aliud observetur excretorium vasculum, & contentus humor persimilis sit lymphæ, in extremos lymphaticorum surculos exonerari, tanquam in propria excretoria vasa. Quid simile in vasis hinc inde in vaccino utero olim detectis observatur, quorum extremis surculis ovaes, & subrotundi hærent sacculi, à quibus glutinosus separatur humor, & trunco communicatur. His quoque lucem mutuare potest morbosa viscerum constitutio, quâ concreta, congestaque



congestâque in exaratis loculis lymphâ ipsorum existentiam manifestare potest ; Plura enim leguntur apud Auctores, quibus patet, vi morbi circa lienem, hepar, aliâque viscera, tumores miliares, & lenticulares copiosissimos observari. Memini, me in cadavere Viri Nobilis in extrema superficie splenis, jecoris & intestinorum innumera ferè tubercula, lentis instar, luxuriantia vidisse. Dies itaque rei tam obscuræ lucem feret, vestraque fœlicitas, & sagacitas veritatem aperiet. A quonam fonte derivetur materia lymphæ, adhuc quaeritur. Probabile tamen censerem, hanc ab arteriis, velut à communi penu, emanare, cum interdum etiam sanguineâ suffusa tincturâ conspiciatur.

Determinatâ compage glandularum, quæ Conglobatæ appellantur, indicatîsque ipsarum vasculis, unum addendum videtur, quod multorum ingeniis imposuit, *varius* scilicet *glandularum interior color*, & earundem *soliditas*, unde nonnulli deduxere ex diverso substantiæ modo, & colore, naturæ varietatem, & consequenter diversum usum. Constat etenim, in aliquibus glandulis per longum sectis, colorem cinereum, violaceum, quandoque rubrum, & non rarò fuscum observari ; quin in una, eadêmque glandula, ut non semel mihi contigit in amplis ad latitudinem trium digitorum sectis

per longum, variæ quasi zonæ, diversi coloris occurrunt, ita ut imponant, in glandula parenchyma proprium reperiri, quod variâ coagmentetur substantiâ. Ex his ramen, quæ multiplicibus inspectionibus & tentaminibus observavi, patere videtur, glandulas secundum naturam degentes solis exaratis partibus integrari, & ex morbo varias reddi. Si itaque longâ maceratione sectæ hujusmodi glandulæ præparentur, elicitur concretus humor, qui ut plurimum in spatiis arearum congestus stagnat; est enim tartarei ichoris portio per venas non transducta, quæ amisso motu, in minimos globulos, & ramenta concrevit. Interdum extremæ vasorum propagines, quasi arborum minimæ radices, coagulato, infectoque succo turgent, unde extensæ colorem communicant, & non rarò glandulosi loculi eodem succo tartareo, subflavo, cinereo vel violaceo, & ambientia ipsa vasa turgent, unde totius glandulæ corpus eodem infici videtur corpore. Hoc passim in hominibus, brutisque, & præcipuè in Bove occurrit, in quo sæpissimè ex morbo glandulæ obstruuntur concretâ, luteâque substantiâ & frustulis carneis diversæ figuræ ramentosæ, coloris subalbi cum aliquali soliditate, & consistentia. Quinimo eadem morbofa constitutio ultra glandulas, pulmones quoque afficit, cum hujusmodi substantia solida lutea  
in

in pulmonum vesiculis stagnans ingentem tuberculorum congeriem efficiat, ulteriori scilicet insinuatione morbosæ lymphæ, & sanguinis in vias spiritûs. Quâ ratione autem contingat, lucem ferre potest observatio in hydropicorum sero per scrotum educto sæpiùs facta; Extractum namque serum, cui vitriolum miscui, post aliquot dies vas figulinum vitreatum penetravit foras exsudando, & sensim evaporavit, relicto sedimento lutei coloris, persimile exaratae substantiæ in loculis glandularum ægrotantium reperiæ, cum tractu temporis in lateribus, & in fundo vasis, exhausto humido, minimæ plantulæ, quasi pulmonariæ, vel coralloidis, eleganter attollantur cum pilis candidis, qui sunt naturæ nitrosæ, ut exploratione igne factâ, patet. Ulteriùs affuso vitriolo sero sanguinis humani, solida exciratur gelatina cinerei coloris, quæ sensim exsiccata, durior, & compactior redditur; & postremò eadem lymphæ à thoracico ductu deprompta aspersione vitrioli pulverizati concrevit in gelatinam; hæc tandem exsiccata ultra vitrioli concreti portiones, pilos nitri exhibet. Ubi igitur vitriolata particula à sanguine derivata in glandulis luxuriant, lymphæ stagnans concrevire potest, & velut aqua fortis reddita in adjacentes, & contiguas partes irruens, ibique subsistens, substantiæ modum, & colorem glandulæ variare potest.

Color quoque glandularum diversus redditur ex arēta, laxāque magis compage; In aliquibus enim glandulæ partibus latiores sunt arēæ, ubi copiosus foeliciter separatur humor; in alia autem portione, ubi nulla ferè fit secretio, & collectio succi, ita angustantur arēæ, ut minimum remaneat spatium, & inconspicua quoque sit moles loculi, unde carnearum fibrarum, & vasorum color variat ab apparentia partis, ubi ampli, & turgidi luxuriant loculi. In pinguedine, & interstitiis muscutorum, & intra ipsas conglobatas glandulas frequenter glandulæ minores cicerum seminibus, rubræ reperiuntur, quæ seclæ concretum sanguinem ultra loculos continent. Quare ex his omnibus mihi conjectari placuit, glandularum compagem de facili vitiari, unde obstructis meatibus, vel plus justo laxatis, deficientibus volatilibus particulis, fluiditatem inducentibus, vel luxuriantibus coagulativis salibus, congestiones fieri, & consequenter ineptam reddi pto separatione lymphæ; hinc Naturam tam multiplices glandulas condidisse, ut deficientibus aliquibus, aliæ præstò essent.

Circa laxitatem, & soliditatem glandularum, à qua nonnulli arguunt *diversam substantiam*, & *operationem*, philosophari licet, mollitiem ortum trahere à majori loculorum copia, eorūque potiori amplitudine, unde laxiores sunt arēæ,  
contenti

contenti fluidi copiosior proventus, & ita glandula pressionibus cedendo, mollis apparet; In aliis autem, ubi tartareæ materiæ copia loculos, vasa, vel interstitia replet, non solum glandulæ corpus densum, & durum, renitensque efficitur, verum ejus moles longè auctior redditur. Interdum etiam oppositâ methodo angustatis vasis, exinanitis loculis, & quasi convulsis, & retractis fibrarum fasciculis, minor, gracilis, & dura redditur glandulæ moles.

Discussis itaque his, quæ in conglobatis glandulis substantiæ varietatem, & compagem indicare videbantur, *aliarum glandularum structuram*. Vobis aperiam, in qua Natura, analogo licet artificio, vario tamen procedit. In glandulis igitur, quæ *subcenturiati renes* appellantur, tam arcta est partium compositio, ut difficulter earum dissolutio pateat. Quæ tamen post diutinas aggressiones colligere potui, Vobis communicabo. Sectâ itaque hujusmodi glandulâ per longum (solida enim, & densa est) ejus moles integrari videtur fibrosis corporibus à peripheria versus medium deductis, ut in renibus contingit. Hæc autem corpora sublutea sunt, & sanguineis vasis irrigata, subrubro insciuntur colore. Fistulosa sunt probabiliter, & excretoria vasa; exortum verò trahunt à luteis quibusdam corporibus inter ipsorum extremitates, & membranam ambientem locatis. Lutea hæc

hæc corpora ovalem ut plurimum, non raro depressam servant figuram, & probabiliter sunt loculi glandularum, quibus mediis separatus humor per fistulosa corpora, tanquam per excretoria vasa, versùs centrum demandantur. Vasa excretoria hiant, vel saltem continua sunt cum substantia quadam cinerea, mucosa, cujus naturam, & minimam compositionem certò assequi mihi non licuit, quamvis interdum subrotundis coagmentari videatur minimis corporibus. Illud tamen evidenter observavi, eleganti vasorum reti, & præcipuè nervis copiosissimis, candidisque, & reticulariter implicitis irrigari; unde verisimile videtur, hæc substantiâ ulteriorem fieri separationem à nervis, vel satius esse appendicem excretoriorum vasorum, eorùmq; extremitatum, cùm immediate nectatur ductui lato, & amplo, qui per longum exporrectus foras aperitur, & in emulgentes venas exoneratur, altero autem capite ramos copiosos promit, à quibus separatim à glandulis, & fistulis humorem recipit. Sinus hic membranâ tenui velatur, quæ innumeris foraminibus pertunditur, quorum forma inæqualis est, ita ut probabile sit, multiplicia excretoria interiùs in concavitatem hiare, à quâ in exarata stigmata patet aditus, ut in renibus etiam proportionaliter observatur. Analogam structuram admiratus sum in glandulis  
locatis

locatis in intestino hærente ventriculo carnosorum pullorum, & gallinarum; etenim hæ copiosissimæ sunt, & elegantissimis sanguineis vasis ambiuntur, exteriùsque carnosâ intestini membranâ firmantur. Pisi formam, & magnitudinem æmulantur, & patenti orificio, velut excretorio vase, in concavitatem <sup>superioris</sup> ~~intestini~~ hiant, & aperiuntur, unde mucosus succus, pitisanæ hordeaceæ similis, exprimitur. Glandulæ hujusmodi exteriùs membranâ tanquam loculo, & principali organo de more integrantur. Interiùs concavitas observatur, quæ orificia quamplurima inæqualis figuræ, & magnitudinis exhibet; Inter exteriorem namque membranam, & concavitatem mediam, crassum locatur corpus, quod diligenti lustratione solum in filamenta, & fistulosa corpora apparet. Quapropter verisimile est, separatum in folliculo ambiente succum per fistulosa corpora, tanquam per excretoria vasa, in concavitatem deferri, quorum extremitatibus rete extenditur, cujus inæquales areæ, quasi tot stigmata repræsentant, quibus eructatus mucosus succus primò recipitur, deinde in concavitatem derivatur.

Postremò aliam Vobis indicabo diversitatem in glandulis quibusdam observatam, quæ *venis continuata*, per longum venæ ramum, vel saltem finem habent. Hæ conglobantur in corpus densum, gracile, longitudinis auricularis digiti, quod



quod versùs apicem ramo contigua venæ, seu sinu per longum obliquè excurrenti communicat. In hoc ductu copiosa orificia manifestantur, ambiens verò substantia de more coagmentatur rotundis vesiculis, seu glandularum loculis, quæ intra areas à rete excitatas, ut in aliis exposuimus, locantur. At quoniam ichor in sinu recolligitur separatus in loculis, ideo necessariò intercedere debet excretorium vas loco lymphaticorum, vel fistularum, quod sagacioribus tandem occurret.

Huc usque ex lustratis conglobatis glandulis videtur Natura usâ, simplicique incedere methodo, dum scilicet excretorio vasi appendit unum, modò plures folliculos, seu acinos membranofos, quibus mediantibus à vasis peculiarem separat humorem, eumque recollectum foras eructat. Eodem pariter artificio in compangendis visceribus Naturam usam aliàs indicavimus, monentes, jecur, cerebrum, & renes glandulas esse, quibus inammas, testes, aliàsque consimiles partes addere possumus; In his etenim folliculorum compages excretoriis vasculis appensa copiosè probat.

Nec opus est, ut iterum repetam curiosam Remum fabricam in Illustrissimo Domino Antonio Davia, Senatoris fratre, à me observatam, & aliàs eruditissimo Spurio participatam, cujus ren sinister uvæ ingentem racemum referebat; Glandulosi namque folliculi membranâ excitati pelvi continuabantur, unde separata urina in  
iisdem



iisdem in pelvim irruebat. Hoc addam, eandem ad amussim structuram in Illustrissima Comitissa *Panthasilea* sorore exarati Domini *Antonii*, Uxore Illustrissimi Senatoris Comititis *de Grassis*, observatam fuisse à Præclarissimo mihi quæ Amicissimo Domino *Sylvestro Bonfiliolo*.

*Cerebri* glandulosam naturam membranosis folliculis congestam mirabilis historia Puellæ à Doctissimo *Wephero* exposita, nervosè & evidenter probat, in qua totum cranium innumerarum ferè vesicularum congerie replebatur, à quibus exortæ fibræ versùs basim deducebantur. Non semel ingens vesica cerebri vires supplevit.

*Hepatis* glandulosam naturam, præter aliàs indicata, abunde firmare possunt observationes hydatidum, & tuberculorum, tartaro, vel concretis succis turgidorum. Et licèt in hepate folliculi glandulosi interdum longiores reddantur, sunt tamen veluti tot cæca intestinula glandulosâ membranâ excitata, quod in pancreate, de cujus glandulosa natura nemo dubitat, deprehenditur, ita ut Natura folliculos rotundos, interdum ovales, non rarò oblongos, Cæci instar efformet, quibus tamen perpetuò, ut separationis organo, utitur. Hoc totum evidentissimè conspiciamus in piscibus, & insectis; In *Xyphia* etenim, *Asello*, & aliis, ut optimè observat famigeratissimus *Redi*, loco pancreatis vas excretorium Natura

D

parat,

parat, arboris instar, cui cæcales utriculos appendit, quibus médiis pancreaticus succus separatur. In bombycibus, & consimilibus insectis, loco pancreatis intestinulum locavit Natura, quod carneis fibris cingitur, & dum angustatur, quasi Colon, appendices lateraliter promit, intus separatum succum continens, unaque cum hepatico ductu in ventriculi fundum hiat. Hepar quoque eâdem metamorphosi gaudet; Nam in *canceris* loco acinorum, & folliculorum conglobatorium cæcales sacculi occurrunt, quibus separatur, & coacervatur bilis; & in erucis ipsis, & bombyce intestinula oblonga appendicibus ut suprâ donata observantur. In Talpa Imperati, gryllo, & consimilibus hepatis loco multiplicium Cæcorum congeries intestino appenditur. Quapropter non improbabilem censeo illorum sententiam, qui *Testes* inter glandulas recensent; nec puto follicitè quærendas esse minimas glandulas in ipsorum compage, cum sufficere probabiliter possint intestinula membranosa, quibus tota ipsorum moles coagmentatur; sunt enim velut cæcales oblongi folliculi, quorum excretoria vasa continentes membranas perforantia, in *epididymidis* corpus conglomerantur, & tandem in unum desinunt. In insectis, & præcipuè in locustis hæc intestinula, quasi brevium cæcorum congeries, testes efformant.

Sed

Sed ulteriùs procedit Natura primævæ suæ simplicitatis non oblita. Nec ex his, quæ Vobis, sodales Doctissimi, communicaturus sum, objiciatis, me omnia uno calceo metiri, solâque cupressum simulare scire; sequor enim Naturæ vestigia, à sagacissimis Viris etiam indicata. *Pericardium* ipsum glandula est, vel glandulosum corpus, quod proprium humorem perpetuò separat. Hoc namque interiùs cooperitur densâ, & perpolitâ membrana, quæ multùm differt ab exteriori tunica. Sub hac locantur carneæ fibræ circulariter, vel à basi ad conum ductæ, vasa sanguinea quoque, & nervi. Factâ itaque compressione in interiori membranæ superficie, guttulæ minimæ, ferè innumeræ, à determinatis orificiis profiliunt. Hoc in homine, pennatis, bove, & multiplicibus quadrupedibus, quæ pertractare potui, perpetuò observavi. Excretus humor, in bove præcipuè, levi ignis calore evaporat, & tenuissimam tantùm crustam relinquit. Diu laboravi in indagine, an singulis orificiis *laculus*, seu *folliculus* glandulosus continetur, & intra utramque membranam custodiat; an verò sola tunica densa sit veluti amplus, & extensus folliculus, cujus peculiaris structura serum à delato sanguine separet. Probabilius mihi videbatur, *pericardium* minimis folliculis ditari, eò quia compressum *pericardium* sæpiùs etiam post alteram diem guttulas seddebat. Pro hujus autem majori dilucidatione patiemini

me observationem in nobilissimo Puero elapsis mensibus defuncto à me factam in medium adducere. In hoc itaque *pericardium* totum crassifectum erat ad crassitiem semidigiti, & in basi, ubi cordi neceebatur, digitum æquabat. Exteriùs ambiebatur crasso, & inæquali glanduloso corpore, quod in lobulos laciniabatur; interstitia verò suborta mucosis quasi placentulis concretis hu noris, sublutei interdum, replebantur; quandoque fluidus ichor exarati coloris coërcebat. Nonnulla quoque globosa corpora glandulosa intra se sinum habebant expositis substantiis refertum. Corpus hoc glandulosum non omnino naturali gaudere videbatur compage, & substantiâ, sed referebat glandularum congeriem morbosâ auctione deturpatam. Sub exposito corpore excurrabant carneæ fibræ à basi productæ, & variè circumductæ, quæ evidenti canitie pollebant. Vasa quoque sanguinea producta ramificabantur, quibus succedebat interior tunica sanguineis vasculis valde crassis, reticulatè implicitis irrigata, quæ in interiori superficie magis occurrebant. Huic membranæ circa interiorem concavitatem arctè hærebat mucosa quædam crusta, seu pellicula, persimilis exaratis placentulis, subvirellini coloris, quâ totus ambitus cooperiebatur, & vi evelebatur; hæc igni apposita iuxta cochleari non solvebatur in fluorem, sed exsiccata magis solidescibat in naturam quasi concreti.

creti feri sanguinei. Denudata igitur, & compressa interiori hac pericardii membranâ, ab innumeris ferè orificiis, parallelis ordinibus situatis, humor guttatim exhibat de more: In tota pericardii concavitate nullus stagnabat humor, sed tantùm continebatur cor, quod totum exteriori quasi amictu, crustâ perfirmi-jam exarata investiebatur, quæ arctè eidem hærebat; quapropter avulso hujusmodi involucro, tenuis membrana cordis lacerabatur, & ichor sanguineus levi abrasione erumpēbat, totaque cordis moles, quasi tabida, & exulcerata videbatur.

Ex hac itaque mirabili, rarâque historia conjectari licet, separationem liquidi, quod in pericardio manifestabatur, à glandulis circumlocatis factam esse, cùm eadem phænomena observata sint in succo addensato intra pericardium, circa cor, & circa membranam interiorem, ac in spatiis, & sinubus ambientis glandulosi corporis, unde, cùm ex morbo corporis tantùm auctio, & meatuum minimorum variatio subsequuta sit, separationis opus videtur à Natura intentum, & consequenter in pericardio hoc glandularum ope ipsam usam fuisse; Hinc non leve indicium emergit, in reliquis subjectis idem opus in conspicuis subsequi glandulosis cribris, & porulis, qui ubi ampliores redduntur, vel in figura vitiantur, ex irrudentibus incongruis succis, congestisque, & interceptis humoribus, patentes, & disparatæ manifestantur glandulæ.

Peri-

*Pericardium* igitur separationem molitur *seri* cuiusdam, quod in vivis, & defunctis perpetuò observatur. Hoc ut plurimum diaphanum est, interdum subrubram quandam tincturam redollet, præcipuè in brutis, & quandoque turbidum cinerei coloris, & salsum reperitur. Hujus liquoris unciæ quatuor in sartagine super ignem expositæ evaporârunt ante dimidiâ horam absque evidenti, & alta ebullitione, relictâ gracili crustâ subrubrâ, quæ interdum carnis elixæ odorem reddebat. Serum hoc non semel ingenti extuberat quantitate; & memini, me in cadavere Ingeniosissimi Civi nostri Domini *Laurentii Zagonii* observâsse ultra quatuor libras sublutei coloris, cum persimilis humor in abdomine ad octo libras fluctuaret; Cæterum in visceribus, & in vasis grumefactus, & niger stagnabat sanguis, qualis in brutis infusâ in venas aquâ forti, passim occurrit. Contingit etiam in morbofo statu totalis hujusmodi humoris privatio, ut in Nobili Domino *Joan. Andrea Landino* observavi, cujus pericardium absque humore ita arctè cordi hærebat, ut avulsam secum raperet cordis substantiam, & in singulis visceribus glandulæ miliares tartaro turgidæ manifestabantur.

Ex quibus omnibus conjectari licet, materiam humoris pericardii à sanguine principaliter separari, cum laxatis meatulis, vel vitiatâ glandulosi corporis structurâ insignis recolligatur copia, quæ à  
nervis

nervis haberi non potest, & hac deficiente, pericardium cordi ita uniri, & consolidari, ut fiat arcta continuatio, sicut reliquis partibus mutuo se tangentibus accidit; Quare mediat humor, nè saltem contiguas partibus cor hærens uniatur, & ita in suo motu impediatur. Moderata igitur quantitas hujus humoris exigitur, quæ ex perenni separatione minimarum guttularum, & ex imbibitione fibrarum, vasculorûmque cordis talis conservatur; probabile etenim est, ut in plantis, & in primæva animalium generatione succedit, ambiens fluidum quamplures particulas communicare contentis corporibus. Hinc fortasse variatâ humoris pericardii naturâ, irruentibus scilicet filamentosis, & glutinosi sèri sanguinei particulis, absumptis à corde fluidis, & tenuioribus, reliquas levi calore circa cor concreescere, ut in exarata superius historia observatum est.

In quem finem verò Natura hujusmodi fluidum in pericardio recolligat, Vobis indagandum relinquo. Illud unum innuam, morbofo reddito hoc humore, cordis motum à suo rhythmo dimoveri: & nuper in secto cadavere cujusdam, qui passus fuerat vibrationem, & tensionem in pulsu cum cordis angustia, in pericardio gemina quasi libra aquæ turbidæ reperta est, & sinister cordis ventriculus ita amplius erat, ut alterum cor continere posset, & arteria aorta extensa erat ad latitudinem trium digitorum, cujus interiori superfici ei ossæ squamæ



squamæ adnatæ erant, ipsæque impensè solide facta erat.

His tactis, transitum faciam ad aliam partem, in qua consimilia observantur phænomena; Est autem *tunica vaginalis testes* involvens, sacculique instar continens, & laxè ambiens. Interiori superficie non intimè contigua est incluso testi, sed aliquali intercedente spatio, veluti vagina excavatur, unde contentus mador, tenuisque humor inter utramque membranam, testis scilicet propriam, & hanc vaginalem in Naturæ etiam statu intercipitur. Humor hic fontes habet non absimiles ab exaratis in pericardio; factâ namque etiam levi compressione ejusdem tunicæ vaginalis, guttulæ evidentes, quarum aliquæ grandiores sunt, & serè innumeræ, à statis orificiis profiliunt, & repetitâ sæpiùs compressione erumpunt.

*Membrana* hæc immixtas habet carneas fibras valde manifestas, quæ in equo insignes sunt, & transversim ductæ versus epididymidis productionem, & per longum etiam reticulariter inosculantur; quapropter minima etiam spatia occurrunt in interiori superficie, in quibus ora humorem fundentia aperiuntur. An verò lymphatica ibidem exoriantur, non adhuc attingere potui.

Separatus igitur humor à vaginali tunica, cum in naturali statu paucus sit, tentamina non admittit; ubi verò morbosè coacervatur insigniter, & aquosam inducit Herniam, aliquibus experimentis aditum



aditum permittit. Igni itaque expositus humor coagulatur in gelatinam, quæ subalba est, & solidior eâ, quæ è cornu cervi extrahitur, & per similes sanguineo sero vi ignis concreto, quin & affuso vitriolo idem humor in solidam gelatinam concrevit, ut in sero sanguinis observatur; Hoc tamen non mihi perpetuò successit, sed interdum igne totus evaporavit, levi relictâ crustâ, quæ carnis coctæ redolebat odorem, & mistus vitriolo adhuc primævam servavit fluiditatem.

Exaratis partibus licebit *Peritonæum*, & *Pleuram* addere, quæ in exteriori parte, quâ viscera respiciunt, perpolitæ, lævèsque sunt, & candidæ tunicæ, ut peculiari videantur donatæ naturâ. Hæ igitur partes multoties compressæ perpetuò à determinatis foraminulis aquam fundunt diaphanam, & salسام; unde dubitari potest, an sint origines aquosi hydropis, qui in abdomine, & thorace non raro excitatur. In hujus confirmationem adducam observationem à Præclarissimo Domino Bonfiliolo factam in equo, qui post vehementem motum, & incalescentiam, aëri hyberno, & irruenti vento expositus interiit: in hoc pleura tota copiosissimis vesiculis ichore turgidis, exasperabatur.

Hucusque *membranis* indicavimus, quæ ex munere, & structura, glandulæ, vel glandulosi corporis nomen merentur, eamque proportionem habent cum simplicibus, & cum folliculis conglobatarum, qui integrantur extensâ, & perpolitâ tu-

nicâ, determinatis meatibus, & porulis perviâ; modò fas est, ut alias commemorem partes analogas reliquis glandulis minùs simplicibus. Et nè, fodatales Doctissimi, paradoxa Vobis videatur hæc mea positio, permittite, quæso, ut post ea, quæ disertissimè celeberrimus Willisius vester de *Ventriculo* habuit, nonnulla de *nervea, interiorique* ejusdem *tunica* indicem, quam primò in *sue* mirari expedit. Hæc sub musculosa locatur membrana, & totam ventriculi concavitatem efformat, rugâsque insignes ex contractione carnearum fibrarum sortitur. Color ejus varius est; nam in partè prope os superius subalbus est, sicut & in parte superiori horizontali, reliquum colorem rubiginosum refert, & circa pylorum interdum aspersâ bile flavescit. Huic membranæ arctè hæret mucus lentus, qui difficulter abraditur. Ab hac filamenta, seu fistulæ emergunt perpendiculariter versùs concavitatem ductæ, ita ut ex his omnibus unitis, & æqualem terminationem sortientibus, novam esse superinductam membranam, & à nervea separabilem nonnulli censuerint, cum tamen nec cocturâ, nec aliâ viâ, absque violenta laceratione separari possit. In parte extima, & concava nectitur, & unitur tota hæc filamentorum, & fistularum congeries nervoso, & membranoso rete; cujus areæ affuso atramento patent. Hoc evidentiùs manifestatur in ventriculo *canis marini*; nam portio œsophagi candidâ membranâ excitatur,

excitatur, quæ fasciculis fibrarum, quasi nervorum, per longum productis, coagmentatur; ubi verò laxari incipit in Ventriculum, in superiori scilicet orificio, ex filamentis lateraliter productis fit rete, cujus areæ sensim angustiores redduntur, donec extensæ super extremitatem fistularum, eas firmant, ambiuntque, ita ut spatia arrearum prohiatibus inserviant; Quapropter membrana nervea dividi videtur; crassior enim portio basis est, & cribrum fistularum, altera verò tenuior pars divisa in rete, continet extremam fistularum partem, & ita intermedia substantia firmatur, & ambitur. Filamentorum hæc congeries à nervea emanans, non ubique similis est, & crassa in suæ; nam prope pylorum, & fundum crassior est, longiores videlicet sunt tubuli; circa verò supernum os breviores existunt, & ferè inconspicui. Hæc substantia fistulosa in exarato pisce, & consimilibus observatur, quin & appendices per longum, quasi valvulæ, eodem fistuloso corpore hinc inde coopertæ assurgunt, hisque crassus, lentusque hæret mucus. Tota hæc tunica nervea exterius nervis & copiosissimis vasis sanguineis irrigatur, quæ eandem subintrant, & perforant, extremisque ramis, tribus, vel quattuor radicibus, & sirculis horizontaliter propagatis per extimam fistulosam hanc membranam ramificantur; Quare injecto in ventriculum canis marini per arteriam atramento, portio ejusdem elegantissimos ramos

manifestat in expositis appendicibus, & extremitatibus productos, & puncta quædam erumpunt nigra ab extima superficie, an à laceratis vasculis, an à fistulis adhuc ignoro. Inter nerveam tunicam, & fistulosam appendicem nullæ mediant glandulæ, sed, quæ sunt circa superius orificium, sub eadem nervea locantur, & excretoriis vasis proprium succum eructant, quod *Aquilis*, & consimilibus familiare est, in quorum superiori Ventriculi parte ingens glandularum copia luxuriat.

In *Asino* ventriculus elegans est, ejusque figura talis est, qualem in hominibus intuemur. Tribus de more compaginatur tunicis, membranâ scilicet exteriori, carneâ, & interiori nerveâ dictâ. Hæc non eundem refert colorem, sed portio, quæ ab orificio superiori exporrigitur usque ad medium ventriculi, candida est absque subjectis glandulis, & exterius parùm aspera est ex brevissimis fistulis; reliqua verò subrubra, & interdum ex affuso muco æruginosa apparet. Hæc crassior alterâ, existet, & tubulis perpendiculariter assurgentibus ditatur, qui extenso reti uniuntur; & licet subjecta nervea membrana una sit, ubi tamen candida portio alteri subrubræ continuatur, ibi fit zona densa, & quasi cartilaginea.

Candidæ huic membranæ interdum *vermes* hærent, qui figurâ, & magnitudine bombycis aureliam æmulatur. Hi curvatis unguibus ab angustiori

angustiori corporis extremitate erumpentibus, veluti dentibus, immobiles ita appenduntur, ut difficulter evelli possint. Horum interior structura elegantissima est; exporrectis namque per longum tracheis pulmones gemini in latiori corporis extremitate extrâ hiantes continuantur, & copiosissimis vesiculis conflantur; in reliquo ventre rotunda, & glandulosa corpora iisdem tracheis nectuntur, inter quæ locantur intestina, & vasa biliaria.

In cane nerveâ ventriculi tunica interiùs lento muco cooperitur, quo cultri ope abraso, emergit rete minimis areis distinctum; Hòc tegitur, & unitur de more fistularum moles, quæ perpendiculariter à nervea membrana propagatur unâ cum sanguineis vasculis.

Postremò hanc eandem structuram in humano ventriculo deprehendi. A nervea namque membrana perpendiculariter fibrosa, seu fistulosa corpora assurgunt, ita ut exterior superficies rete delineet, & vasa sanguinea manifestò occurrant.

In ruminantibus, & præcipuè in ove, ultimus ventriculus, abomasum scilicet, nerveâ tunicâ interiùs cooperitur, quæ exaratis fistulis perpendiculariter assurgentibus ditatur.

In gallinaceo genere ventriculus carnosus crasso ambitur musculo, sub quo interiùs nervea extenditur membrana, quæ perpendiculariter tubulos interiora versùs promit, qui membranâ reticulari,

reticulari opere nequaquam uniantur, vel vinciantur, sed fistulæ liberè in quamcunque partem inclinari possint unà cum interpositis vasorum sanguineorum surculis. Ita miramur in sue, in quo præter glandulas, còpiosissimæ fistulæ oblongæ, & ferè cylindricæ occurrunt, in tenuibus intestinis proceriores, in crassis verò breviores. In bove pariter hæc fistulosa corpora conica sunt. In pennatis in duodeno, & reliquis intestinis cylindrica videntur, in recto autem conicam æmulantur figuram.

*Cotyledones* & ipsi glandulosâ donantur naturâ, ita ut geminis partibus integram glandulam repræsentent, ut aliàs fusè descripsi. Substantia igitur *Uteri*, quæ vaginæ instar perforatur, & conditæ cotyledonum elegantes radices nervoso quodam corpore, quod persimile est nervæ ventriculi, & intestinorum tunicæ, veram integram glandulam, unde probabiliter ab utero, veluti filtro, separatur succus, quasi prîsana, qui iterum pervadit poros radicum cotyledonum, & ita venis affunditur.

Ex his igitur, ni fallor, patet glandulam folliculo membranoso excitari, à quo interdum fistulosa lanugo emanat, varièque configurari, prout membrana conglobatur, vel extenditur, unde manifestantur folliculi rotundi, lenticulares, ovales, oblongi, & quasi cæcales, & postremò insignes etiam vesicæ, & ventres, in quibus omnibus vera glandularum.

glandularum structura, & usus perpetuò elucescit.

Hæc hilari, ut soletis, fronte excipite, sodales Doctissimi; & licèt exigua, & levia sint, materiæ tamen utilitas pretium conciliat; monebat enim *Isocrates*, Longè præstabilius esse de rebus utilibus mediocres opiniones habere, quàm supervacaneas exquisitè didicisse. Nec illud Vos torqueat, utrùm vetera sint, vel nova, sed anxie solùm inquireite, an Naturæ consonent. Valete.

Daham *Bononia* Die.....  
Junii 1689.

---

F I N I S.

---

yg



